

MARTIN UGALDEREN OMENALDIA. Begoña Errazti EAko lehendakariak alderdiarentzako zein gizarte osoarentzako «erreferente» politikotzat jo zuen atzo Martin Ugalde. EAk Martin Ugalderi eskainitako omenaldian parte hartu zuen Erraztik.

Martin Ugalde omendu eta gizarte osoarentzako eredutzat jo du EAk

Martin Ugalde omenaldian bertan egon ezinik, haren seme Unaik irakurri zuen idazlearen hitzaldia

IBILBIDEA

Martin Ugalderen ibilbide politikoa

Hona hemen Martin Ugalderen ibilbide politikoaren erreferentzia nagusietako batzuk:

1948. Eusko Gaztedi erakunde fundatu zuen eta beronen presidentea izan zen. Caracasko EAJko Batzarren eta Euskal Etxearen sorreran ere parte hartu zuen.

1969. Erbestetik itzuli eta Euskal Herrian EAJren antolamendu politikoaren inguruko lanak hartu zituen bere gain, Juan Ajuriagerraren aginduz.

1970. Alderdi aldizkariako kontseilu editorialeko kide bilakatu zen. 1972an aldizkariaren zuzendaritza hartu zuen bere gain, 1976a arte.

1972. Joseba Rezolaren orde, barrualdeko Eusko Jaurlaritzako lehendakariorde izendatu zuten. 1973an deportatu zuten eta Hegoalde utzi behar izan zuten. Bere lan politikoa Donibane Lohizunetik eta Paristik egiten jarraitu zuen.

1976. Erbestetik Hegoaldera itzuli eta Hondarribira etorri zen bizitzera.

1978. Euskal Kontseilu Nagusiko Itzulpen Saileko kabinete zuzendaria izendatu zuten.

1983. Eusko Jaurlaritzako Euskara Sustaketa Zuzendaritzaz arduratu zen, 1985a arte; Garaikoetxea lehendakariak dimitu eta berehala utzi zuen kargua. 1986an Eusko Alkartasunan sartu zen.



PABLO S. QUIZA
Eskuinetik, Gorka Knörr, Carlos Garaikoetxea, Begoña Errazti eta Unai Ugalde, atzoko omenaldian.



PABLO S. QUIZA
Jende ugari bildu zen Miramar jauregian, tartean EAko sailburuak.

Pello Urzelai | DONOSTIA

Eusko Alkartasunak Martin Ugalde kazetari, idazle, historialari, politikari eta alderdikide omendu du eta gizarte osoaren aurrean «eredu» gisa aurkeztu du. EAko burukide nagusiek parte hartu zuten Donostiako Miramar Jauregian egindako omenaldian: Begoña Errazti alderdiko lehendakaria, Gorka Knörr idazkari nagusia,

Carlos Garaikoetxea eta Juan Jose Pujana. Martin Ugalde bera ezin izan zen egon, osasun arazoak direla medio, eta bere izenean Unai semeak irakurri zuen omenaldirako Martin Ugaldek idatziriko hitzaldia (ondoko orrialdean osorik dago irakurgai). Martin Ugaldek gaur bertan 80 urte beteko ditu. Egun, Martin Ugalde EGUNKARIAko Administrazio Kontseiluko ohorezko lehendakaria da.

Begoña Erraztik Martin Ugalde aldarrikatu zuen alderdiaren eta gizartearen erreferente gisa. «Gure erreferente politikoa da alderdian: abertzalea, bakezalea», esan zuen Erraztik omenaldia ixteko hitzaldian. «Gizarte osoarentzat ere» eredu dela gaineratu zuen EAko lehendakariak. Halaber, nazio eraikuntzarako adibidetzat jarri zuen Martin Ugalderen ibilbidea, «indarkeriarekin zerikusia» dutenen aurrean. «Martin Ugalde, abertzalearen osotik abiatu, erreferentea da nazio eraikuntzarako», esan zuen Begoña Erraztik, «gure herria desegin nahi duten horien aurka. Beraz, ETaren antitesia da, indarkeriaren munduan dauden antitesia dugu Martin». Gaur egun, «gure herri honetako herritar bakoitzaren askatasun indibidual eta kolektiboak» auzitan daudela gogoratu zuen Erraztik. Ukapen hori bi aldetatik datorela adierazi zuen: «Batetik, oinazea barreiatuz eta giza eskubideak mespretxatuz hautes-tontziek ukatzen dietena inposatzen saiatzen direnen aldetik. Bestetik, estatuaren aparatoen

BEGOÑA ERRAZTI

EAko lehendakaria

«Martin Ugalde, abertzalearen osotik abiatu, nazio eraikuntzarako eredu da, ETaren antitesia»

indarrak eta hedabideen manipulazioaz hautes-tontziek beraien nahi zutena esatea nahi zutenen aldetik».

Carlos Garaikoetxea, berriz, Martin Ugalderen ezaugarriak azaldu zuen: «Gizon eredu-garria da Martin, humanista sako-na, letragizona, bere herria hitzez eta ekintzez maite duen abertzale petoa, gizarte honetako ahulenekin bereziki konprometitu, lagun eta adiskide aparta ideia eta egitasmo politiko defendatzeko orduan». Garaikoetxea bereziki eskertu zion Ugalderi Eusko Jaurlaritzan ondoan izatea eta «EAren sorreraren garai latzetan» babesa eskaini izana.

Gorka Knörrrek jakinarazi zuen omenaldiak jarraipena izango duela, batetik liburu baten argitalpenarekin eta bestetik erakunde publikoetatik jaso beharreko aitorpenarekin. Juan Jose Pujanak Ugalderen biografia laburbildu zuen, Andoaingo Hamaika Bide elkarteak disko batean bildutako lana ardatz harturik.

Omenaldira, EAko buruzagi eta kargu publikoez gain (Intxaurraga, Azkarraga eta Iztueta sailburuak, Begoña Lasagabaster diputatua, parlamentariak...), Ugalderen lagun ugari eta kultura eta euskalgintzako hainbat pertsona bildu ziren. Besteak beste, Euskaltzaindiako buru Jean Haritzelhar, Piarres Xarriton, Txomin Peillen, Eusko Ikaskuntzako Juan Mari Velez de Mendizabal, EGUNKARIAko Juan Mari Torrealdei, Iñaki Uribe eta Martxelo Otamendi, Elkarlanean-eko Jose Mari Sors eta Xabier Mendiguren eta Joxe Azurmendi idazlea.